

欽定大清會典事例

欽定大清會典事例卷一千一百十五

八旗都統

戶口 漢軍改歸民籍 旗人撫養嗣子

漢軍改歸民籍○乾隆七年

諭八旗漢軍自從龍定鼎以來國家休養生息戶口日繁其出仕當差者原有俸餉足資養贍第閒散人多生計未免艱窘又因限於成例外任人員既不能置產別居而閒散人即有外任親友可依及手藝工作可以別去營生者皆為定例所拘不得前往以致袖手坐食困守一隅深堪軫念朕思漢軍其初本係漢

人有從龍入關者。有定鼎後投誠入旗者。亦有緣罪入旗。與夫三藩戶下歸入內務府王公府屬撥出者。以及召募之礮手。過繼之異姓。並隨母因親等類。先後歸旗。情節不一。其中惟從龍人員子孫。皆係舊有勲。閱世既久。自毋庸再議更張。其餘各項人等。或有廬墓產業在籍者。或有族黨姻屬在他省者。朕意欲稍為變通。以廣其謀生之路。如有願改回原籍者。准其與該處民人一例編入保甲。有不願改入原籍。而外省可以居住者。不拘道路遠近。准其前往入籍居住。其有原籍並無倚賴。外省亦難寄居。不願出旗。

仍舊當差者聽之。所有願改歸民籍與願移居外省者。無論京外官兵閒散。皆限一年內呈明本管官具奏。如此屏當。原為漢軍人等生齒日繁。籌久遠安全之計。出自特恩。後不為例。此朕格外施仁。原情體恤之意。並非逐伊等使之出旗為民。亦非國家糧餉有所不給。可令八旗漢軍都統等詳細曉諭。仍詢問伊等有無情願之處具奏。○八年

諭朕前因八旗漢軍戶口日繁。生計未免窘迫。又限於成例。不能出外營生。特降諭旨。除從龍人員子孫毋庸更張外。其餘各項八旗人等。有願改歸民籍與願

移居外省者。准呈明本管官具奏。原指未經出仕及微末之員而言。至於服官既久。世受國恩之人。在伊等本身及子弟。自不應呈請改籍。而朕亦不忍令其出旗。此後文官自同知等官以上。武官自守備等官以上。皆不必改歸民籍。○十二年

諭。朕因八旗漢軍人等。生聚日繁。家計未裕。於乾隆七年特降諭旨。除從龍人員子孫外。願改歸民籍移居外省者。准其呈明本管官具奏。旋據漢軍都統等分晰辦理。允行在案。朕觀漢軍人等。或祖父曾經外任。置立房產。或有親族在外。依倚資生。及以手藝潛往。

直隸各省居住者。頗自不少。而按之功令。究屬違例。伊等潛居於外。於心亦自不安。朕思與其違例潛居。孰若聽從其便。亦可各自謀生。嗣後八旗漢軍人等。願在外省居住者。在京報明該旗。在外呈明督撫。不拘遠近。任其隨便散處。該督撫咨明該旗。每年彙奏一次。以便稽查。務令安靜營生。毋得強橫生事。如此則於功令不相妨礙。伊等亦得安居樂業。生計有資矣。○十四年議准。漢軍情願在外省居住者。在京報明該旗。轉咨戶部。戶部分咨各省。其在外呈明督撫者。亦一面咨明該旗。一面咨報戶部。仍於

每年終各省造冊送戶部彙總奏

聞。二十二年奉

旨。前因旗奴生齒日繁。降旨將另記檔案及分記檔案之人出旗為民。但念八旗漢軍人丁頗多。且各項人等根莠不一。生計日艱。著八旗漢軍大臣酌量如何選擇。令其各安生計之處。詳加妥議具奏。欽此。遵

旨議定。另戶內除襲佐領世職及年力精壯可以挑取差使人外。其餘差使遲鈍教養無成。以及馬蘭泰甯二鎮京城巡捕三營。尋改五營綠旗兵丁古北口外鷹手人等。俱交該都統聽其情願在某地

為民之處。造入民籍。一體歸於邨莊。○二十三年議准。八旗漢軍年老殘疾不能當差。以及差使平常。不堪教養者。俱令為民。其閒散人等。無以養贍。依靠親屬者。亦令出旗為民。至於領種官地之人。久在各州縣種地。業屬各州縣管束。應即令其就近為民。○又奏准。嗣後八旗漢軍內有願入民籍者。仍照前例。令其在京者報明該旗。在外者呈明督撫。俟該旗該督撫咨報戶部。經戶部行文該處。入於民籍。後年終即毋庸開寫總數彙奏。○又奏准。八旗蒙古漢軍另記

檔案人內。如願出旗在各省綠營當差者。准其遣往入伍。不願者仍令出旗為民。○二十六年議准。漢軍出旗為民中之成丁者。該管州縣查明。給予鈐印手票收執。以憑稽查。其由京赴各省入籍者。該旗給予執照。沿途查驗。至入籍地方。繳換手票。○二十七年議准。八旗漢軍從龍人員。如直省有可依靠之處。任其隨便散處。願為民者聽。○又議准。漢軍內六品以下現任官員。並一應候補候選告退革退文武官員。及兵丁閒散人等。有情願改入民籍者。呈明報部後。

該旗造具家口清冊咨部。由部轉行各該省州縣收入民籍。○又議准漢軍請入民籍者。本支家口一體改入。若有父願在旗子願為民。子願在旗父願為民者。概不准行。其京員自主事以上旗員自五品以上。外官自同知守備以上。均不准改入民籍。○又奉

旨。八旗漢軍內外職官甚多。伊等果將情由報出。載入旗檔。在外居住尚可。乃邇來竟並不報旗。任意居住。及歲數不能度日。又欲入旗。是何道理。嗣後如有任意居住者。俱不准入旗檔。著即出旗為民。○又議准。

八旗另記檔案及開檔人等情願入某州某縣
為民者除該旗咨部外將伊等戶口詳細造冊
委員解送順天府查收即由順天府委員遞送
該州縣收訖後咨覆該旗以備查覈○又奉

旨八旗都統等俱有訓導旗人整理風俗之責如都統
等實心辦事其屬下必皆效法旗人之習自歸於善
矣朕近來分別另記檔案之人概令出旗亦因旗人
生齒日繁令伊等出缺別挑另戶實為有益生計非
以減省錢糧也乃有因獲絲毫之利將已出旗之人
又令入旗實為意外之事不料旗人之習一至於此

是皆由八旗都統素不以事為事一味苟且所致若不痛加改革旗人風俗尚可問乎將此曉諭八旗嗣後諸事務以實心辦理使旗人共歸舊習以體朕心

○又

諭八旗另記檔案之人其業經為民仍復入旗者於二十二年以前之事概行加恩准為另戶但經此次清查後有業經為民之人復令入旗以民人之子為子以家奴為嗣者一經發覺必從重治罪○五十五年奏准漢軍六品以下職官准其為民之例即行停止如有兵丁及閒散人等情願改入民籍者

仍照舊例准其為民。○道光四年

諭。將攸銛奏請革除屯居旗人總催領催名目一摺。向來屯居漢軍旗人事件。俱歸所隸州縣管理。應與民人一律編查。著照所請。將總催領催名目。概行革除。並著內務府及八旗滿洲漢軍都統。將包衣外旗王包衣各項莊頭屯居旗戶丁口。分析各州縣城鄉住址。造冊移交該督。轉發各該管官存貯。以備查覈。

旗人撫養嗣子。○

國初定。無嗣人撫養他人之子。許報明本王貝勒該旗都統。送部註冊。增入本佐領壯丁數內。若

私自撫養者。斷歸本宗。○順治十八年題。凡無嗣人。存日撫養兄弟族人之子。准承受家產。其撫養他人及奴僕之子。不准承受。若存日未曾立嗣。身故後。准近房承受。如本族無人。存日保結撫養異姓之子。亦准承受。若無族人。又無撫養異姓人。照絕戶家產辦理。○康熙七年。覆准。凡撫養他人子為嗣。沒後其子本生父母年老乏嗣。仍令歸宗。○又題。准。凡無嗣人家產。除親兄弟承受外。若叔伯及兄弟之子承受。有親生女者。給家產三分之一。遠族人承受。其女給

家產五分之一。至撫養異姓之人承受及應歸
佐領撥給者。其女均給家產之半。如數少難分。
及有分撥餘賸者。均給承受之人。凡分給女子。
無論人數。止於應給分內分撥。○雍正十二年
議准。無嗣人請立異姓親屬為嗣者。務令該旗
取兩姓情願甘結。並該管參領佐領及族長保
結。送部存案。以杜佔奪財產之端。如無兩姓甘
結。不准入繼。○乾隆四年議准。八旗無嗣人如
有同宗及遠近族人。昭穆相當可繼為嗣者。該
旗參領佐領呈報都統咨部。准繼為嗣。不得過

繼異姓以亂宗支。若無同宗可繼。除戶下家奴
民間子弟。雖與另戶旗人分屬至親。不准承繼。
外。其有另戶親屬情願過繼者。取具兩姓族長
並該參領佐領印甘各結咨部。准其繼立。儻實
有同宗可繼。詐稱並無族人。混繼異姓者。按律
治罪。○三十八年議准。八旗滿洲。凡子已婚而
故。其婦能孀守。並已聘未娶而故。其媳能守志
者。均應為其子立繼。至已娶而故。其婦雖未能
孀守。但其子業已成立。亦為立繼。再如其子雖
未聘娶。而因出兵陣亡。揆之可以勿殤之義。亦

應為立繼。若支屬內實無可為其子立繼之人。則仍為其父立繼。若大宗無嗣。應繼小宗之子。儻小宗止有一子。則令大宗於同族昭穆相當內另行議繼。或同族中又無可繼之人。則俟小宗獨子生有二子。過繼一子為大宗之後。儻獨子並無所出。或止生一子。則於同族孫輩中過繼一孫以承大宗宗祀。○又議准旗人無嗣者。許立同宗昭穆相當之姪。先儘同父周親。次及五服之內。如俱無可繼。方准擇立遠房及同姓為嗣。若繼子不得於所後之親。聽其告官別立。

其或擇賢能。或立親愛。苟無失昭穆之序。聽其立繼。如有貪圖財產。將獨子出繼與人。獨子貪得財產。不顧本生父母。或本生父母有子。所後之親無子。而繼子捨去。或同宗有可繼之人。而繼異姓。均按律治罪。若所繼父母有子。所生父母無子。欲還者聽。○四十年

諭。立繼一事。專為承祧奉養。固當按照昭穆之序。亦宜順孀婦之心。嗣後遇有孀婦立繼之事。除照例按依昭穆倫次相當外。應聽孀婦擇屬意之人。並問之本房。是否願繼。取具合族甘結。即獨子亦准出繼。庶窮族

得以母子相安而立嗣亦不致以成例阻格。八旗及戶部均著照此辦理。○五十六年議准旗人如有過繼異姓旗人。民間子弟戶下家奴替食錢糧者。除分別治罪外。其先後領過銀米。照數追還。儻本犯力不能完。由旗查明歷任參領佐領各按在任月日分賠。批解戶部歸款。仍將失察官交部議處。○嘉慶六年議准八旗及外省駐防兵丁有乏嗣應行立繼者。如係長房長子。不准出繼。其長房次子。次房長子。如係昭穆相當。均准出繼。儻長房並無次子。此外近支亦無應繼之

人應以一人承祀兩房宗祧。雖長房長子。准照獨子例出繼。○道光元年

諭八旗抱養他人之子。冒入旗籍。挑補錢糧。本干禁令。著該都統等嚴密查訪。立限三箇月。責令自行呈報。一概免其治罪。其現食錢糧。及已經入仕者。准照乾隆二十一年之例。另冊註明。及身而止。經此次查辦之後。如有隱匿。或再違禁抱養者。一經查出。定當治罪不貸。欽此。遵

旨議奏。正黃旗滿洲九十二箇半佐領下所屬人丁約三萬餘口。嘉慶二十四五年至道光元年。清查

裁汰幼丁六十餘名。嗣據各佐領陸續呈出抱養為嗣者。共官二員。兵丁一百九十二名。內有旗人抱養民人之子者。有旗人過繼旗人為嗣者。有本身是抱養其子現食餉者。現遵

旨將已經入仕及食四兩三兩餉銀當差者。另冊註明。及身而止。其自願出旗及未食餉者。即行銷除旗檔。是民者歸入民籍。是本旗之人過繼者。俟該佐領缺出。即行撤回調補。或係別旗滿洲蒙古漢軍包衣等項過繼者。另記冊檔。本人及身而止。其子即令各該旗撤回。如有各旗無憑可

查者其子即照抱養民人之子例辦理。○又奏
護軍保亮馬甲花良阿之族長及領催呈出該
二員係屬抱養請交刑部審訊奉

旨保亮花良阿不必交刑部審訊八旗中有似此者或
可另記冊檔。○又

諭刑部奏查訊抱養過繼官員一摺貴州安義鎮總兵
達凌阿本係民人三歲時經旗人額勒登抱養為子
現被伊族兄舒凌阿呈控並據伊自行呈首刑部援
照舊案請將達凌阿作為另戶現在八旗查出抱養
過繼支食錢糧之人均奏明另檔存記及身而止達

凌阿曾經兩次出兵受傷。得有功牌。若與另檔存記之人一律辦理。未免無所區別。達凌阿著加恩撥入正藍旗漢軍。其子孫俱照漢軍例當差。伊留質之案已結。即赴貴州安義鎮之任。其呈報遲延之處。交部照例議處。餘俱照刑部所議完結。並著八旗都統等存記。如滿洲蒙古抱養民人之子。有曾經出兵得受功牌及立有世職者。均准其歸入本旗漢軍。以昭畫一。又

諭。前經降旨。令八旗清查抱養民人之子。據該都統等先後覆奏。復經申諭。將各旗奏摺彙交八旗都統等

查明另有別項情形者。公同會議。並令定立章程。俾嗣後弊絕風清。毋任仍蹈故轍。茲據該都統等會議具奏。所有世管佐領王慶富克善。雲騎尉札普善。恩騎尉五聖。保持保。俱著銷除旗檔。改入民籍。其世職革退。另襲翼長雅爾哈。步軍校青山富太托克托布。護軍富隆阿。及已故城門領穆克登布。驍騎校富勒渾。均經出兵立功。本身及其子孫。俱著改入各該旗漢軍。外火器營向無漢軍人員。俱著暫行留任。俟該旗對品缺出。再行調補。翼長雅爾哈。由外火器營出身。立有軍功。洊升翼長。熟悉營務。著加恩不必對品。

調補。仍留本營。其子孫不准挑選外火器營差使。委護軍參領莫爾賚額。護軍崇祥存陞。養育兵成祥。據該族長等連名呈首。本人堅不承認。俱著交刑部審明辦理。其餘官二十五員。兵兼十五善射一名。副榜一名。兵丁閒散二千三百六十五名。俱著免其治罪。照乾隆二十一年之例。另冊註明。及身而止。至該都統等所議章程。均屬妥協。著即照所議辦理。各該旗務當實力奉行。以期經久無弊。又

諭。文孚等奏續行查出抱養民人為子冒入旗籍一摺。旗人抱養民人為子。前經予限三箇月查辦。鑲藍旗

蒙古馬甲莫沁多爾濟護軍德通限內未經呈報茲據該管參領等查出本應交部治罪但思法愈重則隱匿愈深莫沁多爾濟德通俱著革退錢糧出旗為民免其治罪嗣後如係自行呈首者仍遵照前定章程另冊註明其現食錢糧與所得官職及身而止如係該管官查出者均照此案辦理即行革除文孚等及該參佐領族長雖已屆限外究能自行查出均著加恩免其議處○二年

諭普恭等奏查明抱養民人為嗣分別辦理一摺江甯京口駐防八旗滿洲蒙古自首抱養民人之子為嗣

者。江甯佐領一員。兵一百十五名。共一百六戶。通計家口五百五十名口。經該將軍等查照乾隆二十一年成案。及現在奏定章程。分別辦理。內養育兵二十三名。請撥入步營一體當差。及身而止。文舉人文生員各一名。武生一名。請革退錢糧。歸入民籍。一體鄉會試。其現在領食洲租養贍者。仍請照例支食。俟該領戶身故後。將其眷口裁撤。均著照所請行。其京口查出佐領一員。防禦一員。兵二百六十七名。共二百七戶。通計家口一千二百九十五名口。其已經入仕及現食錢糧之人。一切事宜。均即照江甯現辦章程。

辦理其擬陪佐領曾經記名之防禦一員著咨部銷除記名以防禦本任及身而止至色楞額等四名查無確據即照例革退錢糧歸入民籍此外江甯京口曾經出征並未打仗之後裔即令一體及身而止其曾經出征打仗受傷之後裔八名江甯京口駐防並無漢軍旗分著准其作為另戶旗人該將軍等即逐款分析造冊咨報部旗以憑查覈所有自首之佐領安福明阿納二員所管佐領事務著照所議委令防禦代管即以安福等充當防禦差使江甯候補筆帖式達哈納現當馬甲著俟補缺後停其升轉仍一體

及身而止。並嚴飭八旗協領等隨時查察。實力奉行。以期經久無弊。○又議准抱養民人之子。冒入旗籍之繙譯舉人生員。歸入民籍。改為文舉人文生員。准其一體鄉會試。嗣後再有查出者。均照此辦理。○又議准旗人承繼。如實無昭穆相當之人。准繼異姓親族。以旗人繼旗人。不得抱養民人之子。若抱養民人之子。立有軍功。其子孫歸入本旗漢軍。○四年

諭。錦課等奏查正紅旗鑲紅旗鑲藍旗另檔入丁內充當親軍者。現共有八名。此項親軍。皆係旗人額缺。著

即令其開缺另以正身旗人充補。至另檔親軍開缺後由各該旗詢明有願入民籍者咨明戶部順天府入於大興宛平二縣民籍願入本王公包衣者由該旗撥入包衣當差其於另檔內查出弓匠八名亦著照另檔親軍一體辦理。○六年

諭。王麟等奏查出養育兵存亮係民人姜福之子。經已故馬甲富明阿抱養為嗣。請將存亮革退養育兵勒歸民籍該族長等責革示懲。及該管參佐領等分別議處已依議行矣。前經降旨命八旗清查抱養民人之子為嗣。予限三月令其自行呈報。嗣復降旨申諭。

務期弊絕風清。毋任仍前隱混。現在正藍旗滿洲都統等。既查有存亮冒入旗檔隱匿未報之案。恐各旗未經查出者。正復不少。著再行申諭八旗都統副都統等。務各嚴飭該管參佐領等官。自行詳確查察。如有似前此隱漏者。即曉諭該家屬自行呈報。毋得再有不實不盡。經此次查辦之後。如能立即呈首。尚可照原定章程辦理。儻敢始終隱匿。該管都統副都統及參佐領等官。仍毫無覺察。除將本犯從重治罪外。必將該管各員。嚴行懲處不貸。○同治三年

諭。前因烏魯木齊都統平瑞。在迪化州全家殉難。當經

諭令該旗查明該故員是否另有子嗣在京奏明請
旨。茲據正黃旗滿洲都統恭親王等奏稱該故員京
中別無子嗣。本族公議願將該故員之胞姪桂明繼
與平瑞承祧。經戶部覈與定例相符。准其承繼。查明
請旨等語。太醫院學習醫生護軍桂明既經繼與平
瑞為嗣。著俟百日孝滿後由該旗帶領引見。

[illegible]

欽定大清會典事例卷一千一百十六

八旗都統

戶口

旗人買賣奴僕

旗人逃亡

嚴查保

旗人買賣奴僕○

國初定旗下買賣人口赴各城鎮市交易若越至他旗市被執者身價二分入官一分給拏獲之人○又定滿洲壯丁越旗賣出被首者身價二分入官一分給首告之人買主無罪該管佐領知情者治罪壯丁撤回撥給本旗不知情者壯丁撤回撥給本佐領下貧人○又定有將人父

子兄弟夫婦分賣者。所賣之人均入官。○順治元年定。凡旗下漢人有父母兄弟妻子情願入籍同居者。地方官給文赴戶部入冊。不許帶田地投獻。○二年題准。近京地方管莊人等。強壓愚民及工匠勒令投充者。在內許赴戶部五城御史順天府。在外赴道府州縣告理。審實令歸原籍。○又題准。有假藉投充冒名奴僕。或悍奴欺壓故主。部民陵厲本官。及慢侮措紳。傾陷富室。佔騙人口財物者。事發治以重罪。○三年題准。自次年為始。漢人投充旗下。永行禁止。○五

年覆准投充人即係奴僕。本主願賣者聽。○又覆准俘獲人口。有將其父子兄弟夫婦分賣者。仍令給還完聚。賣主鞭責。○六年題准漢人不許帶出口外。如口外人有來

盛京購買馬匹。乘機買人口者。不准放出。○七年題准投充人置買民間房地者。房地並價銀入官。買賣兩造從重治罪。○八年

諭。投充人有生事擾民者。本主及該佐領如知情皆連坐。前此有司因責懲旗人。曾經問罪。以致投充人益加橫肆。嗣後地方官遇投充人有犯與屬民一例究

治。○九年題准。陣獲人口。准其贖回。令家屬領歸。○
十年題准。八旗買賣人口。均令該領催註冊以
備稽查。民人令親鄰中證立契。赴本管衙門挂
號鈐印。即免輸稅。如不註冊無印契者。即治以
私買私賣之罪。○十七年題准。投充人誣稱不
係投充者。審出鞭一百。如果不係投充。欺壓良
民者。亦鞭一百。○又題准。有將另戶人告稱係
伊奴僕者。鞭八十。其投充人先未在地地方納糧。
後將房地納糧。輒稱不係投充者。審明枷一月。
鞭一百。地方官混報者。以抗違論。其民人住種

旗人房地年久告稱係自己房地者杖八十。又覆准各莊屯皆設領催責成稽查。如旗人有指稱投充欺壓百姓者解部究審。若係假冒地方官依律究擬。十八年覆准旗丁赴市買人註冊時該翼查明給以印照。康熙二年題准八旗買賣人口兩家赴市納稅註冊令領催保結列名係漢人令五城司坊官驗有該管官印票者准買。八年

諭差遣官員並督撫提鎮大小各官不許買良民為奴及轉相餽送永行禁飭違者照略賣良民例治罪。

又題准旗人買民為僕。令本管官用印。若用別旗及隔屬官印。即照拏解良民例議處。所買之人釋放為民。買者賣者各責懲有差。○又議准有將定例後所買之人捏作定例前年月用印者。事發用印官及買者賣者各加等治罪。○十一年議准。凡在順治十年以前買人未用印信。當時中證明白者。斷與原主。或無中證文契。本人自稱賣身是實者。亦斷與原主。自順治十一年以後。買人雖有中保未曾用印者。斷出為民。○十二年題准。旗人買民。查條白契。斷出為民。

者。即遞原籍。令地方官具文報部。並咨明該督撫。○十五年題准。旗人買民。令正印官用印准買。若在地。方犯罪。逃出賣身者。保人係民。枷三月杖一百。係旗人。枷三月杖一百。原價追還給主。賣身人遞解本地方官。枷三月杖一百。仍照所犯罪依律究治。其旗人詭稱民人賣身者。枷三月杖一百。保人係旗人。枷三月杖一百。係民杖一百。流徙尚陽堡。若係逃人。照常鞭刺。○又定。賣身假捏籍貫姓名不從實開載者。枷兩月杖一百。仍斷與買主。保人係民。枷一月杖一百。

條旗人。枷一月鞭一百。○十七年覆准。滿洲蒙古人口。不許賣與漢軍民人。亦不許私自相贈。違者將所賣人並價入官。買主賣主係官革職。係護軍領催披甲當差。閒散旗人。枷號兩月鞭一百。係民人。枷號兩月責四十板。該管佐領驍騎校知情者革職。領催鞭一百。收稅官亦革職。其喀爾喀額魯特人。亦不許賣與漢軍民人。違者亦照此例治罪。○十八年題准。凡旗人買僕由用印衙門呈部轉行督撫。令地方官曉諭里甲。如用印官十日內不將買人緣由報部者。罰

俸一年。竟不報者降一級。○二十一年題准。直
省駐防各官及提鎮以下等官。概不許買本省
之民。違者降二級調用。若縱令家人買者。照本
官買人例議處。該管官失察者降一級留任。其
駐防兵丁量許買人。令賣身人親至地方官處
取具親供存案。契內書情願字樣。用印鈐蓋。若
未經取親供。文契雖有情願字樣。實係勒買者。
買主枷一月。鞭一百。若本官囑兵丁買者。照本
官買人例議處。若本主在京家人充兵在外駐
防者。准買。其在外駐防官之家。充兵者不准。

買。二十二年議准滿洲蒙古家人違禁賣與漢軍漢人者。買賣之人係官罰俸一年。係旗人鞭一百。民杖一百。如佐領內管領驍騎校及收稅官知情者。罰俸九月。領催鞭八十。所買之人並價皆入官。其喀爾喀額魯特人亦不許漢軍漢人買用。違者官降一級調用。旗人鞭一百。民杖一百。所買之人入官。二十六年

諭。駐防滿洲漢軍將軍以下官員兵丁本省買人。如有不容行查原籍。勒令地方官用印者。著該督撫指名題參。嚴加議處。三十年題准出征所獲之人。有親

屬情願來旗完聚者。不得作為奴僕。有願回本籍者聽。○三十九年題准。鹽竈戶賣身旗下者。事發後。將賣身人枷三月杖一百。回原籍著役。保人枷兩月杖一百。仍行文該地方官。追取身價交還原主。如不能償。著保人代償。○五十二年議准。白契所買之人。若在買主家長大。年久即當義子。可以披甲者。亦令披甲。○五十三年議准。四十三年以前白契所買之人。俱斷與買主。其四十三年以後者。照原價贖出為民。○雍正元年覆准。白契賣身之人。經買主配與妻室。

者。不准贖身。若未經賣身之先。或已定親未曾
完娶。賣身時女家並不知情者。必問明女家情
願。方許配合。如女家不情願者。聽其別嫁。○三
年覆准。八旗滿洲蒙古家下開戶人等。間有懶
惰不能度日。串通原主賣身他家。賣後日久又
稱滿洲肆行勒索者。一經發覺。將原主一併議
罪。並將冊籍撤回。給後買之人為奴。○又議准
凡旗下奴僕。或借別旗名色買贖。或自行贖身
本旗及州縣冊籍俱無姓名者。察出即令歸旗。
其有隨家主出差在外。私有積蓄欺壓本主贖

身者。雖在民籍。亦令歸旗。若果係數輩出力之人。伊主聽其贖身。本旗戶部及州縣檔冊可據者。仍歸民籍。舊主子孫不得藉端控告。○四年覆准。吉林民人有願入旗為奴者。報知該地方官。給予印文。准其買賣。○六年

諭。外省駐防兵丁。常買地方民人為僕。此內多有匪類。往往自恃旗人。生事不法。朕知甚悉。既為兵丁。理應隨時隨地。勤苦習勞。方能日漸壯勇。豈可忘其職分所在。多置使令之人。以求便安之理。兵丁所恃以為生者。惟在糧餉。僕役既多。所費衣食亦廣。一人所得

糧餉。何能養養多人。計兵丁僕役男婦。不過數人已足。多買人口。徒費產業。何益之有。且果係良民。豈肯入旗為奴。其入旗為奴者。或在地方被事。欲圖報復。或賭博飲酒。懶惰無賴。不務本業。貧難度日。聊圖餬口。或係大盜懼捕。或為人命逃避。希圖藏身。此等之人。兵丁何能得其力乎。況將犯法為盜之人。買為奴僕。一經發覺。必貽累己身。此皆兵丁愚昧無知。貪圖價賤。妄思多得奴僕。曾不計其養養之艱難。罪譴之株連也。應將奴僕中善良者量留足用。其餘或索原價放出。或賣與無僕之人。庶幾易於養養。既可得力。

又不至罪譴株連。著行文各省將軍副都統通行曉諭。嚴禁兵丁收買民人為僕。嗣後如有違旨之人。著該將軍叅處。如隱匿不奏。著地方大員密奏。儻地方大員亦通同徇隱。經他處發覺。將該管官及地方大員一併從重治罪。○十二年議准。打牲壯丁人等解送貂皮來京。置買旗下奴僕者。令管轄前來之總管副管佐領驍騎校領催等。並賣主之佐領驍騎校領催等。各具保結。赴左右兩翼稅契。其典買民人者。令總管等報明大興宛平兩縣。將典賣僕人姓名籍貫註冊。若黑龍江官兵來京。

置買旗下奴僕者。取具同行官員保結。呈明本旗都統註冊。照例稅契。典買民人亦照例報明。大興宛平二縣註冊。違者僕人斷回。買主照例治罪。管轄官叅處。若將所買之人。三年內得重價轉賣與人者。照略賣人口例治罪。該管各官以失察例議處。○乾隆三年定。自乾隆元年以前白契所買作為印契者。不准贖出為民。○四年題准。奉天買賣人口。令兩造該管官驗明文契。鈐蓋印信關防。准其註冊。○五年奏准。駐防各官。不許收買民人為僕。違者照例議處。若官

員縱令家人私買及囑託兵丁買者亦照本官
買人例議處該管官據實揭報將軍等查出叅
處者皆免議駐防兵丁實在並無家人者具呈
該管官覈實出具保結所買不得過三名仍令
賣身之人親至地方官處取具親供存案立契
鈐印書情願字樣如勒買及現有家人捏稱無
家人多買人為僕者兵丁治罪出結之該管官
及不能查出之將軍等皆照例議處○二十一
年定凡直省駐防各官不許買本省之民為奴
違者降二級調用若縱令家人買者處分亦如

之該管官失察降一級留任。其駐防兵丁准其酌買。不得過二人。違者計口論罪。仍令賣身人親至地方官處取具親供用印。若未經取有親供文契。雖有情願字樣。實為勒買者。買主枷一月。鞭一百。若本官囑兵丁買者。照本官買人例議處。○二十四年議准。凡八旗戶下家人。不論遠年舊僕。及近歲契買奴僕。如實係本主念其數輩出力。情願放出為民。或本主不能養贍。願令贖身為民者。呈明本旗咨部。轉行地方官收入民籍。不准求謀仕宦。至伊等子孫。各照該籍

民人辦理。儻有借他人名色認買。私自出旗。或將子孫改姓潛入民籍者。照例治罪。斷歸本主。有鑽營勢力欺壓孤幼贖身為民者。倍追身價給主。將人口賞給各省駐防將軍副都統為奴。如係本身得銀放出潛入民籍。止科其不行呈報之罪。仍准為民。○二十五年定。吉林甯古塔伯都訥拉林阿勒楚喀等處旗下家奴之女。不許給予民人。違者治罪。○又奏准白契所買之人。如本主不能養贍。或念有微勞。情願令其贖身者。仍准其贖身。如本主不願令其贖身。悉照

雍正十三年以前白契所買家人之例辦理。儻家奴有設法贖身及倚強贖身。除治罪外。仍給家主。或賞給外省駐防將軍副都統為奴。○二十七年定。嗣後家奴犯徒罪者。俱不准折枷。竟擬徒罪。徒滿仍發回旗。交伊主管束使用。○二十八年奉

旨。向來旗下家奴多有書寫旗奴者。甚屬非是。著交各該處嗣後俱寫旗下家奴。不得仍寫旗奴二字。○三十一年奉

旨。向來旗下家奴有酗酒行兇者。一經本主報明該旗。

即行送部發遣。其妻室有年老殘廢及不願隨帶者。仍在本主服役。定例未為周密。蓋家奴犯法。其妻亦屬有罪之人。自當一體發遣。但此等罪犯妻室。豈能官為資送。儻其中果有不能隨帶者。或令依棲親屬。或聽婦另嫁。不便仍留服役。以生嫌疑。嗣後該部旗遇有發遣家奴之案。照此辦理。著為例。四十一年議准。八旗絕戶家奴。無族主可歸者。該旗查明果係遠年舊僕。及乾隆元年以前契買之人。造冊送部。轉行地方官收入民籍。其乾隆元年以後契買之人。令其贖身為民。身價銀兩。照絕戶

財產例辦理。○又議准。賞給功臣子孫之罪奴。其妻孥應嚴行管束。如補授外任及駐防外省。將所賞之人全行帶往。不得聽其留京散處滋事。違者嚴行治罪。○又議准。八旗官兵人等買用奴僕。令其報明本管佐領。於契內鈐用關防。赴左右兩翼驗明。加給印照。歲底兩翼監督將名口身價數目造冊送部備查。不必由司坊驗報。○又議准。各旗入官人口變價銀數。自十歲以上至六十歲。每口作價一十兩。六十一歲以上。每口五兩。九歲以下幼丁。按年歲作價。未滿

周歲免其作價。○四十二年議准。東三省人來京置買奴婢。如係旗人置買民人。即在該管佐領處當官立契。查無來歷不明之弊。稟知該都統於本人原領進口票內添載所買奴婢名姓年貌鈐蓋印信咨送戶部。用該司印信立檔存查。即將原票發還該都統給發本人收執。若所買奴婢票上並無名姓。守關兵弁即時拏送刑部分別治罪。○四十四年奏准。嗣後各省駐防官員果無家人使令。准其呈明該管官。該管官出具保結。並咨地方官問明民人情願賣給。方

准收賣。仍不得過四名。以示限制。○四十七年
議准。織造鹽政稅務各監督衙門長隨。儻有懷
怨望之心。不肯實心出力。有意僨事。陷主於過
者。該監督可就近交地方官衙門嚴加懲治。雖
長隨非契買家奴可比。但平時倚託衣食所資。
即與奴僕無異。應將各衙門所用長隨之不堪
驅使者。准該管官驅逐。不得任意去留。以杜觀
望之弊。再長隨如有無故潛投他處者。即照旗
下逃奴之例。一律辦理。○四十八年

諭。向來官員人等家奴。在本主家服役三代。實在出力。

原有准其放出之例。此項人等既經伊主放出。作為民人正身。亦未便絕其上進之階。但須明立章程。於錄用之中。仍令有所限制。嗣後此等家奴。合例後經家主放出者。令該家主報明本旗咨部存案。經部覆准後。始許其與平民一例應考出仕。然京官不得至京堂。外官不得至三品。以示限制。著為令。○四十九年奏准。嗣後

盛京等處官賣家奴。毋庸解京。即令本處大臣照例作價招買。至所變價銀。就近解交

盛京戶部。留為該處公項之用。○五十六年定。八

旗戶下家奴。如有鑽營勢力欺壓孤幼贖身為民者。倍追身價給還原主。將人口賞給各省駐防兵丁為奴。○又議准。外任漢督撫准帶家人五十名。藩臬准帶四十名。道府准帶三十名。同知通判州縣准帶二十名。州同縣丞以下等官准帶十名。其所帶婦女亦不得過此數。漢督撫有管兵之責。如有多帶者。令其自行題明。至旗員更有邊疆差遣之事。非漢員可比。督撫准帶家人一百五十名。司道以下等官所帶家人照漢員加一倍。如違數多帶者。分別議處。○又議

准調補臺灣武職所帶家人總兵副將准帶三十名參將遊擊准帶二十名守備以下等官准帶十名旗員外任綠營武職加一倍如違數多帶者照例議處

旗人逃亡○原定投遞逃牌在京者限五日二百里以內限十日四百里以內限十五日將逃自何處及日期姓名年貌服色並初次二次三次有無攜帶軍器詳悉聲明咨刑部緝拏○又定八旗另戶及家人逃走自行投回者該旗將逃走次數日月多寡及在外有無為匪分析咨

明刑部。其逃條初次一年以內投回。二次六月以內投回。三次三月以內投回。及年十五以下十歲以上者。皆免治罪。毋庸送部。於文內聲明。勾銷逃牌。此外應治罪之犯。該旗將人文併送刑部。○乾隆八年奏准。外省駐防兵丁逃走。除咨報刑部外。即開明逃人年貌。知照在京本旗。及沿途有駐防兵丁地方。並附近省分一例嚴拏。分別次數治罪。其窩藏之家。及失察各官。皆照例治罪。○又奏准。兵丁內有因病狂逸。自行投回者。亦有為事牽累。或負債深重。藉端逃

走年久投回者。其事不一。嗣後選拔護軍馬甲
時。令該佐領等確實出保。同間散壯丁一例酌
量貧富拔取。若藉端逃走。日久投回。人内生計
艱難者。先補步軍。令其效力。如無過犯。行走勤
慎。仍照常選補護軍馬甲。至補護軍校。驍騎校
時。皆不得列名。○九年奏准。旗人逃出。斷不潛
住京城附近之處。行令直隸總督。八溝熱河副
都統

盛京等處將軍。蒙古札薩克等。差委官兵。務將此
等病狂逸出。藉端逃走。及失迷被誘之旗人。嚴

加訪拏。即解交刑部審訊。若實因病狂逸出失。迷被誘者。仍准選補差使。令其效力。若係藉端逃出者。即照逃人例治罪。交該參領嚴加約束。再旗人生計仰藉錢糧。若永遠不令食錢糧。實屬艱難。俟過一年。如果改悔。該參領出具保結。咨送步軍統領。拔取步軍。如果行走勤慎。俟三年後。該統領咨送各該旗。選補護軍馬甲。○十年議准。八旗另戶兵壯。如果係瘋狂汗邪。該管各官理宜豫為管束。乃漫無覺察。及至逃走。又捏為具報。殊非管束旗人之道。嗣後除十五歲

以下之幼丁被人誘拐或迷失路徑者。仍照例通行緝獲外。其八旗所報瘋狂逸出汗邪迷失之人。如一年內不能拏獲。各該都統等於年終將逸失人數開明具奏。交刑部查覈。會同兵部照駐防旗下家人脫逃例。按名數分別議處。至兵壯內實係逃走。而該族長等諛報患病發狂。該佐領等不確實查明。即為轉報及逃走之人。在駐防旗員所屬與文職所屬地方存留居住者。皆按例議處。再八旗印契白契所買家奴。本主並未得力。竟爾拐帶財物潛逃。旋復更名易

姓。託人轉售。應通行順天府五城並各該處地方嚴行查拏。○又奏准。駐防兵丁初次逃走。於一年內自行投回免罪者。該駐防處。往往以該犯兵缺業經別行拔補。彼處無產業可依。咨報留京。是伊等轉得以逃走為留京之計。嗣後仍發回原處酌量令其充役。不准留京。○二十三年奏准。嗣後拉林種地者私自逃回。拏獲後即咨送刑部。由該部具奏押送本地正法。○二十六年奏准。察哈爾蒙古俱係載入八旗蒙古之人。儻有逃人。應與逃旗一體辦理。所附察哈爾

旗分年久之舊額魯特若有逃人亦照察哈爾
蒙古之例辦理至新附之額魯特仍應較舊額
魯特從重辦理如有逃人捕獲後即行正法其
自行投回者俱發往煙瘴地方充當苦差如又
不安分即於本處正法○二十七年奏准屯居
旗人或來京辦事或往他處謀生者皆由該
管鄉里領催報明酌量給限該鄉里領催仍於
每月彙報該州縣儘有逾限不回者該州縣申
詳理事同知行查其所往之處若無故遲滯或
潛往他處即查拏懲治仍令該管官員不時稽

察屯居領催等若有託故勒索等弊亦即嚴行懲治。○又議准八旗脫逃之人如有隱匿者拏獲後將隱匿之人無論滿洲漢人俱加一等治罪。○二十八年議准另戶滿洲蒙古人等脫逃一月內自行投首者除該旗將逃人家口一併發往伊犁賞給步甲錢糧當差外仍報明刑部註逃並咨報戶部存案。○又

諭滿洲蒙古本皆世僕乃至逃走必其平日行為下賤債迫所致著八旗將乾隆十八年定例以來另戶滿洲蒙古內逃走一月自行投回及拏獲者俱查明戶

口。一併發往伊犁充當步甲。食餉當差。儻仍不改悔。復行逃走。此竇生性不肖之人。可削除旗籍。任其所往。永為例。○又奏准。八旗領催如有逃走者。由該旗照護軍前鋒親軍之例。一體奏

聞。交部通行各衙門嚴行緝捕。照例治罪。○三十一年奉

旨。嗣後伊犁駐防兵丁內如有脫逃者。拏獲之日。即行正法。毋庸定為流罪。著為令。○三十二年奉

旨。嗣後旗人逃走。無論年在十五歲以下及十六歲以上。俱不准呈報汗邪迷路。仍照逃人呈報辦理。○三

十九年

諭。據大學士舒赫德奏辦德州潰逃駐防滿兵一事。除已拏獲外。尚有十二名。現在飛咨各省查拏。俟獲後即當正法。並將該兵削去旗籍。逐出妻子等語。朕之令如此嚴辦者。以滿洲臨陣退縮。已失正道。而又逃去無蹤。故並逐其妻子。以示彼自外於滿洲也。但臨陣之人。或因傷身死。亦未可知。若以現無蹤影。即將其妻子削除旗籍。未免可憫。是宜拏獲後再逐出妻子。方為平允。嗣後有似此者。均照此辦理。○四十年奏准。嗣後遇有八旗逃人。由該旗照舊報部外。

隨即咨行步軍統領衙門順天府及五城嚴行查拏。不必專待刑部轉行各處。至刑部接得該旗文移。仍照例即速咨行各處一體嚴行查拏。再交各該旗據實詳報逃人日期。斷不可耽延隱諱。○四十一年定。凡幼丁迷失。年在十五歲以下。即於十五歲以內緝獲投回者。免其治罪。給付本家收領。若迷失時在十五歲以下。至十五歲以上始行緝獲投回者。仍照逃人例治罪。○四十二年奏准。八旗滿洲蒙古閒散人等逃走發遣者。遇

赦後仍歸入各該旗檔內嚴加管束按期點驗不得聽其游蕩滋事。如五年內安靜改悔該旗量挑差使。儻該犯於五年中又生事故即發往伊犁充當苦差。不許挑取官差。並永遠不准放回。○四十四年奏准嗣後八旗職官逃走立即具奏通行嚴緝。儻該管官捏作常人投遞逃牌者照贍徇捏飾例降二級調用。○四十六年議准旗員告假出外者無論口內口外到該處時即報明地方官並聲明係辦某事。如該員不行呈報者即照逃旗之例分別治罪。○四十八年奏准

滿洲蒙古正身旗人。有犯竊盜私逃者。無論逃在一月內外。俱照在京旗人逃走發遣當差在配。怙惡不悛之例。改發雲貴兩廣邊遠地方。令地方官與民人一體嚴加約束。○五十六年奏准。凡幼丁迷失。不知祖父姓名居址。後經認回。以及年在十五歲以下。至長始自投回者。均免其治罪。給付本家收領。○嘉慶元年議准。在京滿洲另戶旗人。於逃走後甘心下賤。受雇傭工。不顧顏面者。即削除旗檔。發遣黑龍江等處嚴加管束。毋庸派撥差使。如無受雇傭工甘心下

賤等情。仍依本律辦理。○五年奏准。凡另戶旗人逃走。無論滿洲蒙古漢軍人等。初次逃走被獲者。鞭一百。一年內投回者免罪。一年外投回者。鞭六十。二次逃走被獲者。加號一月。鞭一百。六箇月內投回者免罪。六箇月外投回者。鞭八十。三次逃走被獲者。發黑龍江等處。三箇月內投回者免罪。三箇月外投回者。鞭一百。三次後復逃者。其投回不論年月。均照初次逃走被獲例。鞭一百。交該旗嚴行管束。如各省駐防及屯居旗人有犯逃走者。均照此分別次數辦理。○

七年

諭已革恩騎尉百甯前赴香山探親未遇在雙全鋪管看伊祖墳唐八家住歇嗣因患病令唐八進城報信唐八未經赴百甯家告知該佐領等以百甯出外無蹤恐係私逃隨呈明都統將百甯奏請革職適百甯即於是日投回咨送到部百甯出城探親實因患病未能回家並未託故私出且即在伊祖墳園住宿本可無須向該旗告假惟因送信之唐八不即到伊家告知而佐領等又未查詢明確率行報逃辦理未免過當嗣後各該旗遇有報逃之案俱當詳細訪查本

家及墳園果無著落。方行具報。不得似此率意參革。致有屈抑。

嚴查保甲。○同治元年

諭。瑞常等奏遵旨會議一摺。另片奏請嚴查保甲一節。著八旗滿洲蒙古漢軍都統各按本旗所屬地面。凡居住之旗民人等。以及鋪戶廟宇客寓。即各委派旗員會同地面官認真稽查。按日造冊咨報。步軍統領衙門與各該地面官所造冊檔互相覈對。儻有容留形迹可疑之人。即由該旗移送步軍統領衙門審辦。並著各該管衙門堂官互相糾查。如查出所派旗員

及地面等官奉行不力。即著從嚴叅辦。

[illegible]